

四庫全書

集部

欽定四庫全書

集部  
宋詩鈔卷三十七

詳校官中書臣賈鏊

主事銜臣徐以坤覆勘

總校官編修臣王燕緒

校對官中書臣劉源溥

謄錄監生臣鄭家屏

欽定四庫全書

宋詩鈔卷三十七

內閣中書舍人吳之振編

陳造江湖長翁詩鈔

陳造字唐卿淮之高郵人自以無補於世置江湖乃  
宜又以物無用曰長物言無當曰長語故稱江湖長  
翁年二十五始學儒四十三登乙未科尉繁昌改教  
授平江府參政范石湖曰使遇歐蘇名不在少游下

尋知定海縣授朝散郎淮南路安撫司參議官病卒  
陸放翁序其集謂能居今篤古卓然傑立於頽波之  
外其詩椎鍊不事浮響故見許如此

寄二孫

憶昔初抱孫雙鬢颯已秋眼看與我長歲月如許道我  
以薄宦西汝為守舍留夢輒來後前歲律歛再周想今  
與迺父長我更半頭天姿粹而溫整整靜不浮六經如  
取攜八面自優游落筆動萬言頗能如翁不如翁何足

道抗志須前修良匠有妙斷惰農無厚收彼哉碌碌者  
不源而計流吾言不虛往過是夫何求

右庠

阿秦幼儻礪勢若泛駕馬暫別已束髮折節殊曩者誦  
書口瀾翻晝夜曾不捨課肯犯雪供筆亦揮汗把才地  
校優劣不在阿儒下平時於方兄眇視真土苴念翁少  
年日為學不餘暇混俗類疎放秉心廼儒雅兒今頗肖  
吾解笑時苟且師匠求有餘好書不外假緬懷螢雪邊  
力倍功更寡可用吾季孟直輩古班賈

右庠

七月附米舟之浙中作

白蟲散如蛆黑蟲聚如蟻循緣仍咂齧欲寐復九起吾  
舟玉為粒生此果何理神奇作臭腐秋暑況如燬人生  
託洪爐一飽蓋分爾臨流念彫年胡廼置身此笑口忽  
喈惋曼膚或瘡痍隄防費應俗情偽良不美短籬護松  
菊吾歸殊可喜錐刀詫朋儕嗟爾商販子

召伯停舟辟雨

去年是日之山陽辟雨繁梁作菩薩蠻云

牕度荷芰風舟艤駕鵞浦落帆憩篙師避此白淙雨長

征取愜快留滯不云苦適喜縣麻勢為盪礫石暑去年  
舟繫柳臥看虹飲渚龍公會事發尚記跳珠語崎嶇不  
偕俗似為龍所予一杯酬新涼開瓶先酌汝

過樊村

襄鄂二千里何啻三百灣風色九順逆左往復右還舟  
行已三日沿流不作艱即今蒼煙面猶是泊處山信次  
有定期曲直了不關聊可供戲事輕橈與回環

贈錢郎中

利方利祿媒抱道俗不省詩書工發冢孰起世儒病錢  
侯挺直節璽徵復蘭省劔氣夜星明鵬翮秋霜耿上煎  
論世務萬乘為首肯平生中原慮壯歲左符請不作黃  
閣想擬試白羽秉孤忠當寧知宏圖時宰領羣兒須圓  
曲謂可力勝命彼此計乘除得甕喪崇鼎平生信所得  
一鑑照萬境幕中辭脂韋客右進嚴冷主簿聱牙伯評  
俗怒生癭謂伯永令君強項翁爭事不藏謂劉山陽但有周  
舍思可無衛武警我亦意行者泥古志未送朝來聽名



理剪燭延落景寸田殊易荒有賴剔榛梗效竒乏良策  
汲深慙短綆惟期佩公言不墮頽俗窳

八月晦試院中作

官居課程地生有文字癖誠知蟲負山詎得辭此檄嘉  
禾古多士孰者非巨擘老眼不待封舊苦眩花隔勿云  
石賈玉歲失眸亦得

荀子云失歲者眸面得之

捧心若為妍竊鉢徒

自匿陸海貪窮搜竒寶多偶獲巧常昏金注勇或便大  
敵清醕聆鄒琴欵識辯周髀頗收半段槍遐念連城壁

渠應悔焦袖吾敢厭難肋撫囊寧利穎體國免素食明  
朝羅客拜定自百夫特俗無拋塼惡歸舟緩張席

三月初晚晴寄高縉之三首

東風掃積陰殘雨不敢漂壞雲裂裳帛倒掛墜嶺腰烏  
影不作暝夕陽明山椒安得上上頭風露永清宵

人家繡閨閒湖上粧面新湖山簫鼓中魚鳥安得馴山  
靈建飛雨淨洗綺羅塵即今隄邊柳為誰管殘春

曲欄倚青冥萬井入指顧湖光漾明霞照我凭欄處森

木倦鳥歸遙空征鴻度定知待月人破竹有奇句

車堰牛

牛力輕萬鈞性順異諸畜有足不解蹠有角不皆觸課  
日引耒耜為人給穀粟私家憂闕食公家要餘蓄公私  
雖相須置汝誰取足奈何過堰客行舟動千斛挽牽亦  
諉汝顛顛頸髀縮扣角一勞之不語對以腹物生愧無  
用懷安或作福於人儻有益塵身豈云酷君看廟前牲  
被繡飽芻菽膏血薦鼎俎誰定悲穀鯨

舟行即事

昨日出曹娥明日指慈谿待潮舟為膠得潮舟若蜚留  
滯復一快計程元不遲人生意失得孰者乘除之今屈  
昔已伸彼贏此或虧但可自適過尚用悲喜為水伯愚  
弄人政如造物兒丈夫木作腸渠輩未易知

餞寄定海交代

縣尹古子男今不一錢值低催奉簡書偵伺常屏息白  
簡與按章歲月供彈劾當路雖所懼姦民巧狙擊吻間

售蜂蠆意外變白黑防虞莫救過彌縫或逃謫政使有  
卓魯未容置形迹云何世難事君不動聲色編民翕風  
移惡少且心革田廬有笑歌魑魅亦竄匿斯人紀仁愛  
幾磨南山石政聲懿如此僅免繩治厄諸公蜚鶚書犯  
嚴尚遺力安得定海民為君灑薦墨蘭臺傳循吏採訪  
多失實安得定海人為君秉直筆嗟我吏隱者志在山  
南北身名萬金重如博試此擲賴今遺愛地一一可矜  
式政恐效西子美顰得嘲劇江臯一樽酒聊挽朝天客

妙樂喧江浪清譚到理窟盟言底遽寒舟駛潮水急西  
望念風義感歎徒至骨

送李象山趨朝

象山海邑古稱象山即今聽  
李明府言頗亦費支吾故云

書肘詎容掣筭柱不可膠付事多其防職業自寂寥頗  
思圓機士細苛舉網條宰邑古難之茹苦耐煎熬百抑  
不一揚推波益驚濤由來法愈密祗為下所操一饑驅  
我出銅墨強折腰挾翅著籠中側睨鵬冲霄平生有知  
已持橐貳銓曹君來定倒屣道我不自聊願推變通術

霧雨均枯焦而況代舍舊骨惜引手勞

十二月二十六日趨府

誰謂一舍遠不辦三食趨亭午縣市西衙鼓府城隅匹  
馬驚鳥去指槌冰在須北風挾霜氣萬象付摧枯想當  
折琴絃未怪裂人膚馳裘被甲如是日有若無客首不  
暇回顧客少踟躕出處不能同勞逸為之殊龐翁馬少  
游似非隱者徒鄉居老躬耕飽溫得自虞婆娑銅墨間  
盍亦省頭顱裝褫脫中熟吾口良易餬

別俞君任通判

一代石湖翁韓歐或其儼當時出門下如君屈幾指論  
定難為才我乃輩多士椎成方未噐正賴君礪砥師友  
繫魂夢栩栩輒千里驚見得此客乾鵲預為喜一笑破  
千憂天幸寧有此石湖倏眼中此翁真不死

邵伯阻風小泊贈送行諸公

長征每愛日小泊未還意陰風自南北客子聽軒輊召  
崇望吾鄉不作秦越異船閣鴈鴛洲人穿魚鰕市相逢



各吳語知識十三四水實不自買海錯有佳饋餞行餘  
十客超俗見友義笑譚寒谷春為我洗羈思相與臥玉  
瓶跋燭得微醉老懷易作惡別語毋動喙

魏帝廟

佛狸歲未卯志欲吞宇縣當年江飲馬腥血浸淮甸無  
人飯耕牛有井巢歸燕至今閱遺史為汝空飲恨緬想  
瓜步留殺氣纏吳分云何此山椒遺像儼高殿無乃甘  
事讐吳俗昧所見或復綿歷久後嗣忘敵怨冥莫彼有

識福汝吾敢信君看趙與薛徇國冒禍蒙魏侯繼前躅  
長呼死白刃胡不尸祝之香火均遠近豈但祈神休抑  
使頑懦奮誰今決從違引手適我願

趙侯立薛侯慶魏侯勝皆淮南死事

也將也

### 長蘆寺

昔年望長蘆去江逾百步垣宇呀已缺浮圖欹欲仆僧  
徒噬肯留日有沈溺懼重來舒望眼佛刹非故處安衆  
得亢爽定遷疇夙素似聞瓶錫侶復作醯蚋聚居人禱

蠶麥行客乞泉布營者肆夸侈施者不顧慮百堵煥金  
碧奚翅復其故往往豪雋人四壁有未具彼徒創寺意  
取鎮湍濤怒向來梵唄所脩為蛟螭據在己不自保誘  
俗說依怙波流置不省此理吾未諭

泊慈湖北岸

坐覺江流平漈漫裂三股舟子告風橫因循宿中浦慈  
湖古戍近猶復小江阻漁翁家葦間蝸舍無鄰伍把酒  
訊三老此寧泊舟所諗我今昔異解帶無所苦向來探

九徒白晝猶翫午一自尚書來此輩凜刀俎江山亘千  
里有屋皆外戶似聞襄江道衽席過行旅翳公舊威愛  
平寧尚如許兩地好經行為官喜欲舞倒牀鼻雷吼夢  
破聞船鼓受欺墮姑息迂儒彼何取

謂張尚書定叟

上下驛磯

湖陰數里間山麓屹兩磯磯麓突江出禹功不及施千  
古妨行舟死生繫毫釐我昔步磯上雨歇暑氣微驚湍  
下百尺怒勢轟千輦尚憂坤軸動無怪沙岸歆蟄龍渠

得安過鳥翅欲垂頭眩膽為掉坐歎舟上兒壯哉天下  
險姦軌容抵巇如身護風寒要地此幾希今來歲華暮  
去舟良坦夷人言水進退寒暑分盛衰古來設險守亦  
有可易時函谷與劔閣秦漢嘗用之人輕地亡重正煩  
折筭咎恃險無興國興國須藩籬帝王所取重文武各  
攸司險易倏變改即礮餘可推

蕪湖感舊

下帆同烏樓掛帆逐雞起但見蕪湖月耿夜清如水江

左此壯縣我昔舟屢艤諸公各敬客歎曲豈今比酒杯

慣邀留妓圍供燕喜流連動十日

每過蕪湖朱丁諸公約以十日為期

揮

掃或千紙舊游想如昨故交今餘幾逝者泉壤隔存者  
參辰似浪憑楚些招盍寄相思字可能喚巫陽且欲托  
雙鯉

過繁昌

江山互映帶竹樹渺隱見居人江山間安處忘古縣泊  
舟穴子初舊觀儼自薦嵒山高攬雲雲際抹深靛慰我

塵埃容嘉此煙雨面山脚慣奔走尉曹分卑賤縣人應  
指似髻改顏狀變漂零渠未知憂患嘗欲遍俯仰二十  
年轉眄閱蜚電故人半在亡在者或海甸明朝理去楫  
山影暝江練安得人如山來往長相見

繁昌早發

客行固塵身留滯如挾翼及茲祖禮竟蓐食理帆席風  
停浪未蟄天曙月正白版磯滙湍殺荻港煙樹碧杖策  
丁家洲徙倚容少息無酒問山店憶鱸聽村笛烏烏啼

松竹鴈鵝下沙磧回柁投曲澳又寄糝潭夕情疎或易  
合不作淮楚隔纍然槁項翁軟語慰行役

泊海子口

池口至海口望望三舍外辰發莫已到回首西日在風  
師肯憐客祖道煩一啗我舟疑凌虛楚山真歷塊蜚鳥  
相讓疾驚浪乃弗逮窮途坐局縮頗嘗得此快適邁自  
本圖闕供恐貽悔未辦問村醪且計具薪菜

泊小姑山



楚山屹兩姑我見乃其稚聞名詩卷間識面客舟次玉  
刻極端麗簪植暝蒼翠娟月上天角相與姤嫵媚怒風  
將我西未慙卜晚憩山足舟可艤山木纜可繫山外正  
風波獨此佳食寐斷知有神物主此勝絕地明朝捐行  
橐可無答神賜白鷺雪為肪綠蟻香馥鼻舟穩風又熟  
無乃契神意未暇訪彭郎辭費辨非是

郭家洲

攜兒上絕岸微徑步蒙密人稀鳥烏樂老屋幾百室荒

涼郭家洲籬落映殘日問俗得周旋  
門頗蒼卒興衰今昔殊郭姓尚十七  
鄰里闕鹽茗翁姬僅盥櫛共說頻  
歲歉平陸江浪沒場圃或潭洞  
椽栱行蟻蛭去秋微收爾樵採  
取黔突接耳多樂郊一去恐兩失  
吾邦有杜母撫我不待乞蠲租  
桑柘在休役孫子佚意使流殍  
無寧後倉廩實官今潯陽來吏  
師那容失書紳拜此賜知我  
佐郡紱古來裨肉食多自芻蕘  
出必若窮吏道孰先究民疾剝  
膚快目前吾固笑無術

離富池

江流寂無聲，明滅窻月曉。  
客枕歸夢餘，意先西蜚鳥。  
雪天信少風，翳面正繚繞。  
富池忽信次，肯羨鵬鵠矯。  
向免犯險艱，神惠顧豈少。  
今晨有佳興，調笑向諸小。  
波平旗脚直，康莊馳騷馱。  
鱗鱗到座隅，健鵲啁林杪。  
人家積蘇間，山影橫練表。  
未成官縛去，得句吾事了。

龍眼磯

甚小而巧  
漁者聚焉

誰謂石一拳，不作江流礙。  
朝來揚帆西，瞥若驥歷塊。  
龍

眼風火磯培塿視華岱似聞潢潦時亦復鼓湍滙鑿去  
本不難奇巧禹所愛其上嘉樹密其側魚網曬居惟羨  
漁鄉復欲老犢背西歸儻得此庸敵七里瀨

次臧秀才讀蘇集

秀才甚文  
予未識也

自我得蘇集玩閱幾忘年汲甘乏脩綆適遠疲短牽取  
一九不隨望若終茫然子齒始半我用志超我先晶瑩  
出秀句妙斲遺雕鐫此翁溪堂奧駢闐誰敢專潢污置  
不云學海須百川怪子介且方落筆盤走圓子真蘇門

徒豈獨長短篇平生脩月手不補衣履穿秦黃晁張陳  
衆星耿霜天世儒昂其首指似如登仙子起斯人後游  
刃牛無全邢娥望可知衆女空丹鉛何時班荆地解我  
心懸懸即今清夜夢不止懷昔賢

雪夜與師是棋次前韻

投醪士或醉說梅人不渴窮途餘樂事不受憂患逼詩  
可供呻吟棋亦識死活朝來喜雪句神藥胎可奪一枰  
與兒晤斷非市聲聒既免沈舟謖不作賭墅謁指冷良

易忍眼花苦為孽疏置仍作罪隨意畧細閱瓜葛勝負  
間時亦近屑屑策幾奇兵鏖地比弱王割吾非江左管  
祗續愈愛說升沈作豐悴今古無成說家居鼓吹具藉  
以保晚節掀髯得一笑為汝倒焦葉袖手聽殘更紅麟  
瞋晴雪

再次韻

雪應時可喜晴不遲尤  
可喜雪止恰除夜因作

人間十日雪已潤夸父渴宿雪忽披靡羲馭與抑遏春  
從九地回旋放牙甲活主張披拂是大塊司予奪椒柏

追時序鼓吹聽曉聒詩壇有同盟辦作銜袖謁得雪晴  
更佳過是或為孽羣山半披剝衆巧獻一閱懸知兵吏  
集不待鋪木屑令尹活人手小試牛刀割廣文甘僻左  
不肯事容說與俗分樂事盡以韻語說獨慙長鬚送不  
量好時節六一謂聖俞曰山婦云好時好節  
送詩攪人家不知吾輩所樂在此要此百篇  
富趁此梅未葉正使領兒觥快作湯沃雪

至喜鋪

外朝走馬息險絕欲無路駟駿感萬蹄勢若敵場赴崩

騰臨空曠踈足此小駐蕭然一驛旁為此數家聚川城  
南山下邑屋隨指顧行人不勝喜息駕始此處茫然愀  
然意南北分來去我解房州印初試歷險步胡為亦自  
得不作罷茶慮鄉心建瓴水歸夢受風絮殘年歸來引  
他日遂初賦是役固已勞端復酬夙素臨風搔白首一  
笑飭徒御

涑口守風

辦舟留襄陽辟風泊涑口得行秋甲辰初到夏癸酉跛



鬢已自慣束髮至衰朽坐是冥得喪况復多病後絕憐  
操舟兒不措脫穎手顧瞻峴山亭覲面可奪取微風吹  
薄暮霽景掛高柳涼月欲略箕陰氛尚侵斗明朝起拖  
計未敢決可否身已不藉在心自無何有一事萌一意  
但見掣君肘擁書坐蓬窻醉我不以酒

赤口灘

漢江多惡灘赤口乃其最前年將家上正值江流殺奔  
衝震溝畎狼石森戟鏃顛顛取進寸一跌尋丈退聞此

尚痛定躬履况兒輩今者劈箭去未覺有湍滙一雨動  
三日遠岸卷澎湃向者險巖地了不經眼界三老笑相  
語無復憂滯礙路可屈指計歸將平心待窮塗偶快意  
此惠莫謀大龍公本何心賤子多感慨

旅館三適

予以病愈不食麵此所嗜也以米藥代之且宜燒猪客有惠清白堂酒者同時

饗作三詩識之

厥初木禾種移殖雲水鄉粉之且縷之一縷百尺彊勻  
細蠶吐緒潔潤鵝截肪吳儂方法殊楚產可倚牆嗟此

玉食品納我蔬藪腸七筋動輒空滑膩仍甘芳豈惟僕  
餐餌政復奴枕椰即今弗洎感頗思奉君王

雋永項上臠紅嫩劣帶膾彼美大欄君坐受羣毛朝鼎  
涪走真味正籍松炬燒芼我銀絲窩葱豉巧和調堇塗  
非所宜淑郁如蘭椒腹腴但下隸羶根合藤條併填長  
翁腹未覺喉牙搖但訝大嚼餘無補詩腸枵

佳齋肯見分春意偕客至誰將清白名言代碧香謚起  
淪饒磁甌玩吮色香味醍醐馥牙頰沆瀣沃肺胃桑落

古宜城不足偕品第我病久不飲此日欲小醉快哉羈  
寓中乃遣拜嘉惠一盃先晨飯歛作凌雲意米托薦燒  
豬佳此三者備飽足仍酣醺眇睨人間世

官務

磨阬為官多曉了未更歷今世從仕者萬口用一律文  
按日從事鴈鶩竊投隙自謀脫悔吝初肯計易劇追逮  
有踵接符牒動山積豈念南畝民晷刻校目力停犁聽  
上命質衣供旅食誰定老我師黠民幾鬼域締彼刀筆

吏表裏肆狙慝奈何食肉人立說與推激此論儻不破  
此弊終未息揆予閱世熟敢此諗在職

### 命書

命書唐濫觴委源傳呂後有倡莫為遏波蕩今不救字  
育叵數計八字詎所圖甲子動垓億舉一百萬漏荒唐  
無稽据誦言指休咎奈何聰達人頗復安此謬懷刺叟  
長裾偃蹇文士右夸詡走干謁薦墨不待叩士有待濡  
沫百請不一售我昔遊江淮知識間新舊文士不到眼

此輩日交蓮辭章輕盃水羨彼行橐富鰓鰓問利祿吾  
儒所深陋自笑與世違迂論取排詬

財昏

師昏古所辭財昏今不耻傳祀合二姓古者貴由禮四  
德五可外貨賄亦末爾民風日就頹捨此爭校彼媒氏  
未到眼聘資問有幾傾篋指金錢交券塞租米東家女  
未笄儀矩無可紀已聞歸有日資送耀鄉里西家女三  
十閉戶事麻枲四壁漏風霜行媒無留趾坐貧失行期

趣富貴貪鄙流弊例不免其源實此起多約或少酬暫  
譽甘長毀坐令親舊歡詭譎變狐兔何況性習間貧富  
歧臧否土俗未易挽人情大不嫩悠悠何足道吾以諭  
君子

### 聽政

為政貴中和徇古無取無心斯善應奸譽乃其蠹奈  
何聞見間往往用心誤扶弱抑其彊古或垂此譽世異  
俗且殊處今猶徇古曲直本不昧彊弱豈所據君子不

此恤情偽溷丹素富室被剝胥日有貧窶慮士夫受加  
陵悔不齒編戶羸弊取必勝玉色吞氣去不知世富室  
如母子所怙不知意定向未語機已露傳繼用一律抱  
冤莫赴愬用是致和氣南首問燕路

錢弊

為家重墻垣為民須償殖楊廬國百尺東南賴控扼淮  
民魚米餘百償仰殊域用銅防外泄用鐵乃奇畫一利  
伏一弊救弊要得策持償貿官券捨此莫衣食錢償天



下用鐵乃限南北坐令兩淮民塊處斷貿易計鐵取券  
直十纔取六七朝賢愛淮民此困盍矜恤銅鐵均國寶  
通變豈無術近甸視遠地未可歧畛域況今苦倒垂倚  
待振焚溺緣江八郡爾雜用顧何失官券朝北來淮俗  
暮安宅即今私鑄斷胡尚膠今昔吾貧復淮人計勢不  
容默

吳節推趙楊子曹器遠趙子野攜具用韻謝之

平日從俊遊寂寂坐多病犯牀漫飛埃瑤笙罷重請  
牀犯

置樂器牀謂宮調相  
犯修樂器惟笙曰請  
昔遊喜復到風物他日盛坡恐名

燕支樓亦詫端正新交間舊友氣合宮羽應譚塵永霜  
厲筆陣鸞鶴動吏隱分樂地與世不好徑拔貧辦一歡  
挾貴輕百乘四豪載酒過講德珠壁映歌奏雲近人舞  
罷驚顧鏡酬酢忘主賓笑語似紛競朱樓識阿眇白酒  
醉師命明朝耐殘醒江聲醒幽聽此樂謫仙後同異君  
試訂四豪成風手可但隻字警我投詩社名拜手敢貌  
敬

記夢示師是

青燈寒夜思吾鄉  
合眼便坐吾家堂  
阿丁炯然目如水  
綵衣翩僂趨我傍  
中心喜之謬督過  
還為遨嬉廢書課  
指似斜日西牕紅  
小賦未破書未供  
向渠不敢思勝義  
亦憐忸縮不自容  
蝶蜚鹿失忽驚寤  
撼撼霜風挂亭樹  
幾時筆力跨乃父  
與汝相忘不闕慮

題胡處士猿轡圖

畫工神品今代無  
初嶽一脈傳醉胡  
幾年傲睨不落筆

乘興掃出赤縣圖今君所寶亦第一我疑神遇非有筆  
青林紅葉晚未暝遙山遠水秋一色五猿踞石相因依  
兩猿掛樹松枝低仰睇側顧麀善疑其二行齒如不知  
昔人畫馬師廐馬畫山直付居山者野猿不馴麀易驚  
邀影渠能寫閒暇草露空荒遠刀機即今放麀誰氏子  
山峰負毒不足憐盍貸蠪蛸留報喜

布穀吟

人以布穀為催耕其聲曰脫了潑袴淮農傳其言云郭嫂打婆浙人解云一百八個

鳥何與人事人以意測之是非皆不同為作此

潑袴不容脫鳥語徒慙勤輸租質農器有袴那解新官  
中催科吏如虎告時趣耕爾能許即今春種未入田安  
得縣胥知愧汝卑棲俛啄良易謀聒聒彊任田家憂啼  
時未旦夜不休班班血痕銜口頭人將近似測禽語汝  
意真解憂農不或傳悍妻天所怒姑不可撾渠不顧罰  
為此鳥聲曩慙警世母為郭家婦南方諛佛古到今人  
持數珠家梵音區區說似一百八譏訶勸相知何心浙  
風淮俗隔江水意解禽言乃如此蘇黃妙句誰嗣之兩

地流傳併須紀世間儒墨紛相攻巨細彼此臧穀同爭  
如痛飲臥長晝付渠馬耳謝東風

壑山叟

雜木漫山誰所種居不臨流多不用九月霜風捲黃落  
羣山一夕皆班駁遙看拖帔橫祿衣農家刈粟山有畦  
家家墾田日嫌窄荒林翳薈惜虛擲斷荒作熟不掛籍  
輸官之餘給衣食州中之政常近厚不欲屑屑校升斗  
寧其棄之聽民取實亦藉是作康阜繼承不皆惠慈守

汝須彌縫吏胥口防有後來規稅畝

竹米行

竹君亢宗擅楚墟一一脩聳山澤臞風流秀整與世殊  
楚俗食息皆爾須薪之籬之且蘧蔭筭筥箱篚簞籃簋  
溝瓦厥祖羹其雛隨索斯獲掇諸塗今歲麥秋早歲餘  
得麥僅足償官租竹君憫農如士夫著花結實千林俱  
密砌玉粒綴琉珠株擷取雖鎔銖彌頃旦畝無閒株  
磴磨蒸炊勝雕葫鄰里乞索水火如坐令蟬感興歌呼

野叟好事能分吾香清而冽甘而腴此君行能不一書  
此惠及物旋就枯摩頂放踵忘其軀所學無乃墨者徒  
老子苟祿天之隅袖手無策蘇婢孤投七三嘆吾慙渠

田家嘆

五月初四月尾菖蒲葉長棟花紫淮鄉農事不勝忙  
日落在田見星起前之不雨甫再旬秧疇已欲生龜紋  
近者連朝雨如注麥隴橫雲欲殷腐如今麥枯秧失移  
舉手仰天禱其私秧惡久晴雨害麥兼收並得寧庶幾



餅托登盤米藏庾儂家歲寒無重糴豈知送日戴朝星  
凡幾憂晴幾憂雨吾儕一飽信闌天下筋敢忘田家苦  
春雨寒甚作長句

白龍天飛宜莫測吳儂解數歸消息年年青帝發生時  
妒妒園林春動色西山龍母誕彌月歸覲親親顏供子職  
壽觴瓊醴俗共傳玉鱗素髻誰所覲酸風鼓寒苦霧塞  
行人縮頭欲僵立蛟鼉凍蟄大木拔更問嬌紅并眉白  
閉門三夜淙簷雨起視溪流高數尺去年夏秋走祈禱

雲電收藏日血赤儂家倚鋤望眼穿白汗呀流地龜折  
天可問曷不遣兩龍此時會生日

謝韓幹送絲糕

玉顆瑩澈珠就磋吳鄉早杭莫計過無乃風露秀結異  
移種崑崙之木禾國家厨婦一百技三春九浙付重羅  
銀絲千尋忽縈積中疎外潔生搓按扶桑仙蠶大如盎  
線之本供織女梭悅驚萬啄鬪新巧胃作水茸雪網窠  
即今擬形供食事纖手幻出千紉多倒甌入筯第三絕

色香兼味皆可歌周官賓祭珍饗餌有此復具理則那  
詩翁物色及粃粳得此來前當見訶繒盤漫詫金縷飮  
湯餅徒夸銀線窩瓊酥玉膩信非匹胡麻崖蜜仍相和  
感君汎愛記衰朽回首一笑分餘波腐儒口實長作累  
饒饒之名定不磨金山別去每掛夢老眼復見還雙摩  
娑酣得飽問便腹如汝平生相負何更從公子乞方法  
日當飫之老澗適買田二頃不種秫未怕酒客來操戈

糕不用糯金  
山者名天下

識村翁語

勸耕淨居村翁老而健問其壽云山居淡食乃爾昔一村叟一野僧皆壽百二

守杜郎中史丞相呼而致敬厚設而歸即逝二人壽未必止此厚味非野人所饗也其言有契

予心作此記之

山僧一生饜山菽溪叟所仰纔魚菽闕守侯家與相家  
珍膳不應填汝腹百二歲翁清且羸茵坐鼎食寧其宜  
焉知暫飽博長往穀神震怒脾媪悲官家顆粒皆民力  
此祿食之須此骨兩翁妄食壽弗延當念無功暴天物  
我雖不偶猶餐錢車行肉飽隸後先食功揣已懼不稱

因翁有言呼使前盤几畢識翁所言

繁昌縣感舊

繁昌古縣依山麓縣外峯巒更重複連山斷處圍平陸  
有地可耕無十六昔我作尉三年留局促似為山所囚  
野行村宿飯古寺山路纔悉如吾州車如雞栖馬如狗  
風袂塵襟博升斗是時身健髮熟班頗復興懷為奔走  
遠近人家山影濃與我周旋圖畫中山鳥翔集相和應  
野花開謝能白紅薄宦而今更長道回頭祇覺當時好

筋骸罷憊髣推頽不歎飄零歎吾老

出郭

寒食日迓使車初甚怙  
悵郊外春色慰人戲成

江縣居人寒食下少在縣中多在野哭聲不似笑聲長  
麗服新粧盡遊者長郊芳草接天綠我亦行行策罷馬  
盍簪命醉豈不懷卑官出入原無假偶來却勝特來好  
觸處春光可圖畫幾日陰寒風用壯今朝霽景天所借  
趁人胡蝶作團蜚逐婦鳴鳩數聲罷天桃艷杏雖已過  
郁李金沙猶未謝其餘紅白爭姸媿醉態啼粧各蕭灑

顰風笑露顏欲語半吐梨花最閒雅游人幾許健倒去  
紅粉誰家短牆亞良辰獨醒還自惜捐佩一樽猶可貰  
餅盤錫飭已寒盟故人應問花應訝對春長作了事癡  
不念清懽本無價會當從公謝不敏百罰深杯不辭把  
魏花有約待人歸秉燭酬春期後夜

望夫山

亭亭碧山椒依約凝黛立何年蕩子婦登此望行役君  
行斷音信妾恨無終極堅誠不磨滅化作山上石煙悲

復雲慘髣髴見精魄野花徒自好江月為誰白亦知江  
南與江北紅樓無處無傾國妾身為石良不惜君心為  
石那可得

檢旱宿香雲

香雲之山瞰平楚松篁路窮得僧宇明牕深室皆嚴靚  
白菊紅渠相媚嫵它日欲來坐忙迫此行忽忽寧得所  
蒲團憩定飯秋蔬衣袂黃塵尚如許山僧共話豈須禪  
但愛茶甌如潑乳投牀有夢不能記忽聽風林如過雨



鷄聲不二擁被溫又恐罷驂陵險阻出門便覺仙凡隔  
猶聞宰堵風鈴語今年旱暵遂無年枵腹籲天連保伍  
頗能念我困馳驅兩兩致詞相勞苦但使秋租毋病汝  
吾自卑官慣塵土

謝朱宰借船

宰為蕪湖  
予官繁昌

書生祿邀空自憐三年官滿囊無錢身如絆驥心千里  
安得一舸西風前令君磊落濟川手留滯亦憐窮獨叟  
大舟百尺影白虹借我搬家我何有函牛之鼎著鷄肋

涓滴渠須瓠五石劣留兩席寘圖書輦石囊沙壓搖兀  
典衣買酒餉三老槌鼓鳴鑼人看好相過重讀借船帖  
我自盧湖君絕倒

自繁昌歸  
先經于湖

田家謠

麥上場蠶出筐此時祇有田家忙半月天晴一夜雨前  
日麥地皆青秧陰晴隨意古難得婦後夫先各努力倏  
涼驟暖繭易蛾大婦絡絲中婦織中婦輟閒事鉛華不  
比大婦能憂家飯熟何曾赴時喫辛苦僅得蠶事畢小

婦初嫁當少寬令伴阿姑頑

房謂婦為頑

過日明年願得如

今年剩貯二麥饒絲綿小婦莫辭擔上肩却放大婦當

姑前

### 徐南卿招飯

徐郎陋巷四立壁乘間亦戒賓友食慈親哀鬢不供剪  
定賣春衣典書冊念君治具良騷騷與渠侵早來得得  
小樓十客不餘地猶勝陶翁劣容膝江西米藥絲作窩  
吳國香杭玉為粒嗣宗阿戎各好士笑頡頏鄙仍婦德

老子旅寓得此飽勃鬱詩情喙三尺出門未妨雨墊巾  
萬屐聲中緩歸策

再次韻

東隣客來每堅壁西隣客來嘗蓐食旅中一飽豈細故  
偕舉大事書之冊末路孜孜食眠計外此敢忘戒在得  
蘇端向我顏色好衝雨不辭泥沒膝居貧頗禁惡客惱  
念子枰薪仍數粒肺可用稊米可餅餅付饒饒飽君德  
人謂裁詩等裁錦拙婦渠能把刀尺陶翁冥報苦未虞

搜攪肝腸閒倚策

再次韻

白晝曲肱睨東壁鷄斯空復賊糧食晚途自笑硯生埃  
少日頗常韋串冊生世恐隨草木腐忍使功言兩無得  
長安寧無翕耨者自宜有鐵闌腰膝樂天任運時近酒  
子房逃榮猶却粒求窮我者迄未知夫此誰怨夫誰德  
擬訪鶯花豁襟抱門外雨餘泥一尺山陰不待興盡回  
掠面東風寒策策

戲作

飲食小過不佳趙帥招飲淡食止酒因成古詩

書生稟賦紙樣薄平日扶衰惟粥藥一日飲溼小嚙肥  
河魚數日煩醫治佳辰府公約把酒嚴斥厨丁預節口  
借問王賓醕酢餘還許公榮袖手無厚味腊毒古不予  
如作病何仍古語生世例非金石堅支離如我更可憐  
饞啗動使諸病入冷坐亦復百憂集彭殤瘠肥本自齊  
此理祇許蒙莊知筋下萬錢無足取厨薦三韭徒自苦  
法士語飲應且憎何如卧客懷中醉不應婪酣任人嗤

穀伯何如辟穀高人師黃石陳遵張竦杓鑿夫何為彼  
此未可相是非七十老翁誰能促戚縛此戒醉死病殂  
吾命在

呈趙帥

訪帥困於腰鋪次  
日帥聞到招飲

雨行本自貪風使四十里程真劈箭長年攤錢夸半仙  
一炊黍頃風頭轉生世快意多所辱葉舟瓠壺浪如屋  
暗椿觸船船板折船丁顛天船媼哭塗窮儻有哀王孫  
腰鋪人家緊閉門丁翁祿邀捕魚者向我顧肯顏色溫

茅屋新成容寄宿  
麻茶初熟仍見分解衣滅燭睡欲死  
鄉夢醒時難喚晨  
平時晨鋪下南浦  
定向揚州聽更鼓  
飛廉生憂吾敢怨  
薄命若為防市弩  
今朝河面吹細痕  
竹樹不聲人駿奔  
掣鈴一笑話疇昔  
便有樂事酬佳辰  
鎮淮主人開渌樽  
蕙蘭香前簫鼓喧  
一盃為我安驚魂  
勝談亶亶清耳根  
向來憂虞無足言

山居四首

山間有好事時  
肯問何如東送筇  
頭薤鮮分匙面  
魚披



襟偕我飽攬髮為君梳一笑塵勞外都無病可祛  
忽作斷過訪經旬閒瘦筇慵添和詩債病減灌園功石  
鼎裏輕碧庭柯零碎紅竹君如見慰竟日嘯牕風  
鳥息我亦倦行行取徑微石稜妨錯足藤蔓每鉤衣森  
木各天籟連山同夕暉推門吟袖冷滿帶野風歸  
涉世慣多選還欣愜此心難孫當歲稔竹母值秋陰言  
配香杭軟行須綠影深繼今摩腹去風日更蕭森

香雲寺

山月明空隙庭柯下槁乾沈沈僧夜淨漠漠鴈天寒夢  
境愁偏隔詩情老易闌未容辭水厄聊復踞蒲團

圩上

小村山影裏山脚水明沙春事初移柳人家未摘茶生  
兒了門戶饌客有魚鰕笑我塵埃者奔馳髣髴華

丁酉道中暮春

去家如昨日節物轉頭非風處綠自舞雨餘紅頓稀野  
橋平水過村路躡花歸起得酴醾在箏琶拂舊衣

得姪消息

甚喜年穀熟仍聞佳食眠郡人新過此鄉信得真傳社  
酒浮蛆淥湖魚割玉鮮平時計安穩莫靳里胥錢

金地寺

側徑崎嶇去飛蘿次第捫山橫欲無地路轉却逢村竹  
栢圍荒寺莓苔上繚垣殘僧不知客芋火老雲根

陪盱眙王使君東遊四首

錦席浮波影牙樯轉霧霏飛花窺碧酒舞蝶倚紅衣野

日歌前淡雲峯望處微游魚應與樂啼鳥莫催歸  
纜解鷗飛處船移柳影中林廬桃李月浦淑蕙蘭風酒  
淺能無醉歌長惜有終賦詩聊泚筆寓意未須工

紅旗圍皂蓋離邇碧山隅水色涵雲樹賓筵着畫圖香  
溫金鑿落花亞錦屠蘇醉裏銀絲鱸漁舟不待呼

風林山闕處茅舍兩三家小駐回鶻隊重尋粟玉花疎  
煙橫暖靄碧溜漱晴沙野興未渠盡數峯明晚霞

都梁

淮汴朝宗地孤埤只眼前  
譙樓西日淡戍鼓北風傳  
破竹非無計澆瓜亦自賢  
客愁渾幾許撫劒倚吳天

天外纖雲盡山巔望眼遙  
平淮剪綠野白塔界晴霄  
客裏風光異吟邊物象驕  
功名他日事回首興蕭條

闕塞淒涼處青徐指顧邊  
如何漢正朔不盡禹山川  
將略輕三捷天威重萬全  
諸公不愒日老子判留年

路惡惟沙磧山回忽市鄆  
樓臺明晚照花竹暝寒煙  
生事知無警懼聲驗有年  
猶嫌武陵遇不載割淮鮮

犬吠蔥青裏人家竹徑深深籬循石磴老屋枕煙岑牛  
瘠知春事鳩啼認晏陰豐年易為客杯酒慰幽尋

年年漢臣節春鴈與同歸番俗尊華服皇家後武威市  
中斜甃賤水外拂廬稀南北皆生息和戎果是非

雨後病起

小臥竹間齋幽懷得好開病從涼後減雨及望時來兩  
屨山千疊諸雛飯一杯吾生計此耳無夢到燕臺

客中

多夜淮瀕夢言歸未有期  
愁禁客舍雨寒過杏花時  
酒廢無何飲春如不自持  
若為丹九轉能黑鏡中絲

次瓜州

雲曠平山塔煙明老渚城  
客行判費日舟泊細論程  
聞水清兼濁潮天雨復晴  
未須歸有夢午枕愜涼生

贈趙秀才

袞袞紅塵去扁舟得挽回  
半生障日手一笑沃愁杯  
應俗吾衰矣論文子壯哉  
明年日邊信滿冀好懷開

定海

齒髮今如此東來料一寒愛民平日事宰縣昔人難稍  
得官租辦聊容坐席安渠儂趨負輓疑未厭兒寬  
官廨鹽煙外居人雜賈胡聽言須畫字討海倚輪租習  
俗何妨陋鮮肥頗不無已甘三載住疇昔計乘浮

聞師文過錢塘

九堰三江外欵帆側拖頻海鮮當入筴雨鵲定隨人椒  
酒須分歲江梅巧借春團藥多樂事未沫物華新



官居

官居不惜日宰縣動三年忍事腸欲爛為防頭救燃不  
應一飽計長受衆人憐俛仰堪供笑人間海易田

送學生歸赴秋試因省別業

年事真無賴官曹已憚煩兒堪付門戶吾粗有田園遊  
舊因相問襟懷為細論此心歸隱計日日受風旂

食口幾鵝鴈田收問菜麻

子美力難及黍稷得種菜與麻

寧堪再攬減

淮人謂歲飢為年歲攬減

又抱兩嘔鴉

越人以嬰兒為嘔鴉

投老憐漂泊何時

了債賒終慙陶靖節歸不計生涯

高頭山

小駐緣雲脚居然睡眼醒楚田衡樹濶漢水挾山青蹠  
蹠初忘倦巉巖已飽經川原方啖蔗不擬嘆漂零

無題

薄宦受風梗還家歸岫雲行人與喬木老色竟平分末  
路慙周朴窮交有墨君看渠綬若若干騎詫鄉粉

書懷

俛仰人間世，纔為一笑資。  
百年羊胛熟，萬事虎頭癡。  
丈字聊遮眼，功名浪朵頤。  
浮生如此爾，況復病餘衰。

次韻楊宰次郎裴

時予亦留西鄉因述懷

信次尚村落，食眠隨曉晡。  
山瓶餘瀝倒，

村人以野釀名瀝倒

僧字

謁伊蒲，笑挾兔園策。  
問收魚澳租，前灘起鷗鷺。  
為我作前驅。

次韻楊宰蒟蘆格

生常信流坎，老不歎漂零。  
雪後菊未死，雨餘山更青。  
仍

煩析塵語遠寄打包僧政續隨詩價多君日日增

次韻張守塗中逢節

向子房州之行亦舟中作歲節飲

塗中歲道盡江影暮澄凝  
柏酒惟宗武河梁似李陵  
問津田叟傲挨拖長年能繫纜  
纔沙嘴人家已上燈

次宿北阿韻

聞道籃輿去遙岡復近阿  
詩應弔孝逸碑或贊頭陀靜  
者官糊口公朝禮作羅憐君  
日阡陌塵土撲陰何

北阿李孝

逸破李敬業處

即事

側徑苔竹潤短籬雞鶩喧小停障日手聊憩臥雲村綠  
影烏皮几新醅老瓦盆平生農圃計重與野人論

再用韻寄丁知縣

南樓酌酒未分襟啁鵲啼烏亦好音晴日倒紅生笑頰  
煙梧搖淥漲盃心可堪歲月供行色盡把江山博醉吟  
不繼蕪湖留十日焦峯浮玉恣幽尋

丁為蕪湖簿留予  
必以十日為期

念衰

心意彫殘底自娛每臨清鏡笑頭顱詩從多病難為好  
官過中年劣勝無急景驅秋著髭鬢歸鴻銜夢下江湖  
更應載酒高陽伴誤輟歌呼喚故吾

閒適

丁年故紙枉埋頭老去時名底用求得句蓋嘗身被諤  
屏書姑免眼為仇闌門工作索馳坐閱世已冥鵬鷃遊  
槁木山麋真適適從來里舍議家丘

次韻蘇監倉二首

時蘇兼  
主邑學

交朋又得一相如高掩虞郎行秘書妙論析微驚我倒  
諸生到眼可人無一官幸此分鄰燭五字渠能攬虎鬚  
快讀清篇病如掃北軒風竹對森疎

長日奔馳傳置如久妨著論與抄書逢人爭席有時有  
疥壁留詩無處無禦寇未辭躬楚製論文常憶攬桓鬚  
扁舟再有東游便肯向朋從自作疎

縣西

一徑斜穿犂确行身閒尤覺馬蹄輕坡頭嘉樹千幢立

煙際長江匹練橫  
茶鼓適敲靈鷲院  
夕陽欲壓赭圻城  
一春簿領沈迷裏  
野鳥山花眼最明

寄幼度主簿

辭家暑雨濺紅渠  
轉首菑花已雪如  
歲月祇隨流水逝  
笑談陡與故人疎  
簡書我正罷長道  
歸棹君行指舊居  
他日霜風吹夢破  
空從旅鴈覓來書

七夕

龍旌鳳扇一相迎  
知費青禽幾寄聲  
天上經年纔舊約



人間轉盼便深更涼河只向樽前落微月偏來酒面明  
後夜玉琴彈別鶴獨應乾鵲夢魂驚

復程平叔

早歲鴻文手自編偶同聞喜聽鈞天漫為官去吾何取  
肯寄詩來子定賢潘岳自憐頭易白士安況苦病相纏  
羨君身健須如漆萬里亨衢穩着鞭

夏夜飲客

矻矻官曹興易窮得閒何惜一樽同  
傍愁邊到無惡客

從竹間來皆好風勝日詩狂輸酒聖轉頭渭北復江東  
雕鞍未足扶攜去更放蘭缸子夜紅

寄陳居仁

尚記誅茅柳外隄水光搖霧潤牕扉桑間曾是僧三宿  
海上能忘鶴一歸野店樽罍醅脚醢比隣雞鶩稿頭肥  
解顏一醉平生事更向行藏計是非

贈仲國美

前年春國美亦留夜飲云

三閱春光一建旣依然歸棹泊危亭烏吟客子各頭白

柳學故人俱眼青曾是縱譚僵婢僕又成豪飲臥壘瓶  
明朝小話前溪別分付溪風管醉醒

贈趙秀才

平生心事釣魚舟解後青山映白頭肯為功名戲雕虎  
不留顏面對沙鷗露漣青蓋高荷曉風約黃陂小麥秋  
入眼斜川歸趣好此身何處不菟裘

京口呈張閣學

歸懷未用話南園臥治于今又北門但息兒啼寬上意

小稽霆擊取中原虎頭銳視非無種獅子當觴且勿喧

更恐譚公家世事斷無宣勸定驚魂

時迂北客故云

約二同年遊虎丘

兼旬閉戶耐寒威起視晴空碧四圍黃鳥啼邊忽遊子  
白龍去後漸單衣年時尚記尋芳約老境仍憐得醉希  
紅影幽香虎丘路杖藜攜酒莫相違

次韻張丞二首

夫君腹笥盡奇謀每叩談鋒聽不休誦賦久嗟無此作

薦賢端合拔其尤小遲榮路觀掀趨聊為同寮蓋謬悠  
政恐諸公有推挽平時果藝仰由求

槁梧閒據自沈吟投老真成負此心酒沃渴鯨悲事往  
官隨跛鼈笑吾今進為終愧周人朴歸去曾無陸子金  
尚賴君詩慰牢落時清輦賸發純音

即事

江漾晨光入縣門樓斜晚影到漁村海聲不為無風靜  
山色居常帶霧昏問俗即今防愒日來時撫事錯銷魂

浮生寄寓君恩重未覺天涯異故園

勞農淨居贈皎啟二僧

勞農今喜復南轅夾道扶攜亦笑諠縣尹庶幾無疾病  
山人迎送耐頻煩  
茗葱湯餅聊堪飽出瓮春醪半帶渾  
惟有為民真實意異時陳迹付公言

九日登樓

海上重陽率多風  
雨邑寄罷飲作

縣曹逢節猶忙迫陰雨乘秋每接連九日歡娛異前日  
幾年晴霽有今年湖山入座褰珠箔萸菊接香薦玉船

帽委西風判一醉故人應未笑華顛

再次韻謝張守得新居

得巢歸翼愜卑棲尚卷風茅落凍泥病樹緣階旋培植  
舊書堆案細籤題地非新野聊龍臥人似東屯賸客迷  
身世只今供冷笑百川東注月行西

對客再次韻

客來一笑同鄉味便粉秋菰刷藕泥糟汜子薑仍舊法  
籠絨乾笋儼新題白魚紫蟹空濡沫窘兔驚麋想碣迷

自揣臞儒合蔬糲放麕終恐愧巴西

自適

渺漭湖天入短篷心期祇許白鷗同人言火食間蓬客  
自命官身田舍翁酒可銷閒時得醉詩憑寫意不求工  
更那長日溫書眼一送蜚鴻下遠空

雲水為家百累無意行從昔略方隅飲忘醒醉狂常爾  
夢到無何午未蘇遺俗可辭翻鞞錯付渠陰作負舟趨  
澆澆禮法工相聒閉戶仍防大小儒



登平山堂

平山堂上命琴樽前輩風流肯見分  
應客嬾斜當檻日藏山不斷隔江雲  
吟牋得意窺天巧醉面禁涼減纈紋  
杖策歸來新月上落梅如雪點風裘

春日客中

平時漫說醉為鄉對景今如石作腸  
老去猶興客中歎春來剛制酒邊狂  
露桃煙柳為誰好蜂蜜燕泥徒自忙  
紅紫打圍歌笑地暮年多感怕思量

山行寄程帥

雨餘支徑溼平沙  
恰稱卑官下澤車  
雜樹暝煙森立槩  
亂峯迎客儼排衙  
水禽時弄翩僂影  
野草爭開細碎花  
久憶山行此如願  
不應回首更思家

次日再次韻

鷗雙鷺隻傍汀沙  
却滙沙汀過客車  
清吹解撩叢竹嘯  
高山如受衆峯衙  
寒生碧澗懸魚網  
潤著蒼崖贖土花  
所惜隔牆紅紫滿  
行行無暇訪山家

復次韻寄程帥二首

節物匆匆可挽追，直須樂事趁芳時。行春倏喜花圍屋，

借景何殊月在池。

南昌當官借景未妨民恰似鑿池取明月

對酒不無桃葉

女扣舷，却笑木腸兒。山家有約須重到，定放遊人張水

嬉。

人家襖被競攀追，刺史春遊正此時。羯鼓聲中花作錦，

壺籌多處酒為池。絕須絲竹娛安石，賸有篇章付雪兒。

聞道續貂容下客，老無佳句坐荒嬉。

騎過山村

煙村面勢枕蒼山一徑循山作屈蟠  
入望高幢羅翠密掛空匹練噴清寒  
吟髭撚白迎風去粧面駢紅倚戶看  
頗似騎驢后山老倩誰粉墨灑毫端

寄鄉中親友

棋酒游從歎離羣酒牀吟筆漫飛塵  
潮乎可奈才力老甫也尚為南北人  
安信不隨秋鴈到流年倏復野梅新  
南岡北阜憑高地引首吳天幾愴神

再用前韻贈高司理

吾宗如此況他揚碌碌諸雛欠膏堂薄宦幽憂殊未醒  
故園歸夢可勝長盃盤頓頓家鷄嫩翁媪嗚嗚社酒香  
猶記比隣笑行客夏畦龍斷為金章

上巳溪上燕

杜若洲邊卓旆旌佳晨一醉萬金輕春光僅有一分在  
天氣可能三日晴解道蘭亭亦陳迹肯吟楚些愴幽情  
人生到處皆兒戲笑看爭標鬪兩鯨

再次韻荅許節推

新釀開缸淥蟻浮舊辭仍缺唾壺謳宦途要處難插手  
詩社叢中常引頭倒載肯陪山簡醉反關莫厭孟公留  
秋田粗可供佳客不比封君亦素侯

書懷

人間窮達命污隆作意功名欲捕風但見劉班誤車子  
何曾鄧禹笑王融官曹得飽餘何事書課乘閒亦雋功  
少待尊鱸付張翰一溪風月放船蓬

再次韻謝高幾宜惠詩

小家茨竹即為堂暇訪深林索豫章平日牀頭但周易  
看人筆落便靈光庠隆賦質嗟多樣良楮論材要當行  
莫向黔婁問奇貨長沙舞袖可能長

歸歟老秋

已辦求田問舍謀登臨那復更悲秋蟹肥與客爭先把  
稻熟催兒徹晚收霜後峯巒添峭措波間鷗鷺劇風流  
寰中勝處天應惜付與癡兒祇暗投

宿何人家

步尋松篠款谿筇忽到孤山處士家  
十項蒼鱗漾墻角一鉤寒玉挿簷牙  
杯行不乏紅絲鱠飯了仍供白露芽  
把臂傾舒吾已怯又分離緒上歸槎

凌晨張司戶惠詩次韻

小駐江干接雋遊渭清涇濁可同流  
假真笑我陳驚坐造妙推君趙倚樓  
姓字已高時輩上功名尤忌髣毛秋  
等閒莫學金華伯碧水如天擬夢鷗

山谷詩夢作白鷗  
去江南水如天



仕塗決矣息交游姑向林泉訪勝流  
短褐直甘乘下澤  
異鄉終勝賦登樓驚心夢境檀槐戰屈指鄉園秫稻秋  
雉翳龜焦緣有用未聞金彈中沙鷗

西林訪銛師

師頗能詩

天將宿雨淨春空却著湖山鼓吹中  
載酒言辭藉花伴  
運斤來看斷泥工前身師定參寥子拙宦吾今張長公  
俛首人間皆長物未妨分饗北牕風

夜宿商卿家

復用  
字韻

荏苒無警南塘靜  
歎歲村區鼓罷撾  
更喜良宵共譚麈  
幾回親手剪燈花  
酌無多酒仍餘味  
嬾不吟詩政自嘉  
蝶夢蘧蘧纔一霎  
鄰鷄啼罷又啼鴉

晚飯商卿家

用前韻

我似長松久卧沙  
迄今諫鼓夢猶撾  
倚消愁斛人如玉  
欲近書籤眼有花  
投老無庸尚強聒  
過君每肯具柔嘉  
婪酣得飽行摩腹  
不省饑號有暮鴉

重九山陽儀真兩使君送酒

酒會文期興尚濃佳辰一笑坐天窮兩州各遣六從事  
九日俄成一病翁詩不受催空急雨帽無緣落任西風  
明朝晴徑通行屐却漫枝筇遶菊叢

次韻高賓王見投

殘年病眼苦眇昏盡屏甘腴誓綠樽龍樹難逢刮膜手  
孟公顧有獨醒孫頗煩十吏供揮掃無奈諸峯役夢魂  
友義惟公記衰疾新編肯到崔羅門

病念還家可奈愁客中日月急梭投土花暈壁迎梅雨

海燕將雛送麥秋  
霑袖正憐珠隕睫  
關門能復玉為舟  
搗頭閣膝高春卧  
黃妳青奴共此樓

再次韻自註簡賓王二首

魚辟清澄鳥愛昏  
陶翁歸計酒盈樽  
山田雨足鳩呼子  
籬援春深竹有孫  
百首旋編新賦詠  
三生猶憶舊精魂  
小摩他日紅塵眼  
閒送蜚雲過海門

庾郎胸次枉堆愁  
馮衍才名迄不投  
歸去來兮歲華晚  
末如何矣髩毛秋  
令威心事千秋鶴  
張翰生涯一葉舟

回首月堂金谷夢却憐海蜃結飛樓

次張學錄韻

燒香為后山展像拜太虛誰能作九原  
候蟲弔寒墟  
暈鴨久欲忘食蛙近亦稍人言淮浙殊得飽不汝較

再次贈張學錄韻

李蔡下中爾萬目指騫騰何蕃頭欲白  
秋牕耿青燈  
張子攜書來危坐撥芋火三問笑不對政恐非助我

次韻錢倅諸公睡香花

鈎牕玩孤芳殘月衣上明紫囊折蘭麝小風弄初晴

泊上虞驛來日行

梁湖莽蒼外後去未云遲縣市容吾戀江潮不汝期

早夏

安石榴花猩血鮮涼荷高葉碧田田鯢魚入市河豚罷  
已破江南打麥天

滿地榆錢未掃除晝簷忽復燕將雛風牕夢破搔頭坐  
重課兒時讀了書

題趙秀才壁

日日危亭凭曲欄  
幾山蒼翠擁煙鬟  
連朝策馬衝雲去  
盡是亭中望處山

謝兩知縣送鵝酒羊麵

僧樣齋厨永樣官  
饑憑脫粟食無單  
不因同里兼同姓  
肯念先生苜蓿盤

次兩知縣韻

老去棲遲八品官  
劒頤深悔諂田單  
東鄰未省吟髭斷

笑擲牙牌命肉盤

寓吳門

張監留居平江率趙守  
袁憲月助桂玉費作

溪翁園客問何如  
可諱浮生百計疎  
不憚典衣規得酒  
長因乞米銜能書

興闌猛輟凌江棹  
重看鶯花茂苑春  
歸自乘流留亦好  
浙風淮俗總宜人

紹熙壬子勸耕妙勝

桑條麥隴接比鄰  
社酒家炊丐路人  
風俗尚如他日否



憑誰細問故園春

定海甲寅口號七首

長官清苦舊傳聞  
檢放禾苗近四分  
畢竟不緣胥吏手  
旱頭科斂枉紛紛

田租有約不相違  
比着豐年數已虧  
一飽分明郎首賜  
幾曾刺口問抽卑

已抄口數報隅官  
歲後朝餉定不難  
且願眼前疆健在  
趁坊討海過冬寒

水泛溝塍意欲饜凌晨還復雨廉纖早秧未領其感切猶

須插晚穀無多不更埭直康切

父子分頭上海船今年海熟勝常年官中可但追呼少  
不質田輸折米錢

人家兩兩捉春歸笑語相過復嘆咨共說颶頭前夜作  
幾人蒲網罟流尸

連宵飛雨喜滂流已入梅天過麥秋二十年前如此晚  
金城地抱却全收

謝張德恭送糟蚶

德恭師  
文友也

壓倒淤泥白蓮藕半捐介甲露樓纖玉川水厄那知此  
急具薑蔥喚阿添

慶元冬再到盱眙

虎頭山下參天柳親見栽時共我長柳自催殘人自老  
半生不抵熟黃梁

日行犂确面孱顏舊慣山居意易闌見說煙雲暝嶠崿  
北人爭指畫圖看

閒居

營隙地頗事栽種隨遇作  
一詩前後不同故無倫次

雪雲脫壤漏朝陽風物橫前引興長紅糝紫蕤今次第  
遷鶯來燕費商量

種桃接李不辭勤旋作花前把酒人羨殺文禽映花語  
飛來趁得見成春

春來敢自僭衰慵正要檀欒間白紅愛竹少留枝策徑  
灌花分破著書功

步屨歸來未覺勞迎門喧笑問兒曹笑翁渾似魚千里

小園周圍日幾遭

客夜不寐

陣鴻轆轤上雲衢夢欲成時每破除少睡更堪寒夜永  
新來熟遍少時書

江行

帆桅飛去劃空明人倚東風兩翼生世事快人如此否  
日斜三百不留行

到房交代

簷外浮嵐暖翠堆道人親眼為渠開  
食錢官簿何須計直為南山亦合來

復次韻

昔上瞿塘濫預堆盤渦如井放船開  
山行歡喜今非錯備見梢瀆擎漩來

地有錯  
歡喜山

千里髻鬟誰綰結半天蒼翠自嶙峋  
教兒莫憚依山住潤領裁衣盡土人

題驛舍

客到淮鄉話楚鄉長將天末指襄陽如今漂泊君休問  
又過襄陽十舍疆

房陵十首

似聞仙伯厭乘龍常混紅塵市井中覲面未須趨避我

褰衣無計趂尋公

房人謂巧避云起避力尋為趂尋起七靴反趂音歎

陰晴未敢捲簾看苦霧濛濛鼻為酸政使病餘剛制酒

一盃要敵滂朝寒

晨起霧久乃開土人目曰滂朝

祠壇歌舞雜嗟吁下酉猶濡上酉枯誰謂朝來一折雨

歡聲已覺沸通衢

酒水漚曰酉得雨曰一折雨

竹屋高低正復斜蔚藍影裏著人家底消山峽三分瘴

爭課盧仝七椀茶

土人晨飲茶云勝山嵐氣又曰房三分瘴

夏田少雨富來年多雨何妨穡事秋已成日供皮子麵

更教晚稻飽霜收

麵皆塽不塽者曰皮子麵稻待霜乃收曰飽霜米

跨牛待得夕陽回在處諸姍笑口開已借蠟錢輸麥稅

免教緝捕闖門來

弓手下鄉目以緝捕

杯酒清濃肉更肥咸言趣社極歡嬉丁寧向去坐年日



要似如今飲脯時

年日飲食曰坐  
年社日曰飲脯

農閒閭里有逢迎白飲傍邊骨在羹老稚不妨頑過日

邊頭難得是升平

俗謂戲曰頑  
羹曰骨在

刈罷秋禾未敢慵更須趁逐過殘冬城中竹筴今年貴

鹽茗新來免闕供

賣枯竹供爨曰  
竹筴古巧反

翁媼同圍老瓦盆倒簞新酒雜清渾  
視南視北皆春社

且放烏犍臥晏溫

村落所  
聚曰視

春寒

掃雪堦頭曉未乾東風作惡鼻仍酸西園點檢江梅後  
祇有櫻桃不避寒

稍稍春光到眼中衝寒試與小椿筇杏花已尾櫻花拆  
正要深紅間淺紅

清明寒食經旬是笑問風寒更幾餘小杏惜香春恰恰  
新楊弄影午疎疎

平明欲斂雲復厚薄晚未休風更顛老怯春寒不宜出  
下帷添火擁書眠

不寐二首

改變年來所著書依然幽夢隔華胥  
寒更何與衰翁事數到瑱擬殺點餘

追思可樂是丁年日力孳孳有食眠  
頭觸屏風祇燈後慈親笑勸掩陳編

寄張守仲思

一思交好一悲悽楚嶠吳山夢到迷  
怕說萬山天樣遠房陵更在萬山西

四月望再遊西湖

春光陸續委東流看到湖邊安石榴更與蘇堤漚鷺約

辦舟來賞牡丹秋

俗目芙蓉  
為秋牡丹

吟詩自笑

文字光騰萬丈長錦官老杜豫章黃投荒忍死經人鮓

討飯充腸上岳陽

南昌詩云我雖窮至骨猶勝杜  
陵老憶昔上岳陽一飯從人討

宋詩鈔卷三十七